

## **B. BESKRYWINGSPUNTE**

## **B.1 ROEPING EN IDENTITEIT**

### **B.1.1 BELYDENIS OOR DIE OPSTANDING**

#### **Oos-Transvaal**

Die Sinode van Oos-Transvaal versoek die Algemene Sinode om 'n eietydse interpretasie van die Twaalf Artikels te gee.

## **B.3 BEDIENING**

### **B.3.1 BEVOEGDHEID VAN GEESTELIKE WERKERS**

#### **Namibië**

Die veertiende vergadering van die Namibiese Sinode versoek die Algemene Sinode om die posisie en bevoegdhede van geestelike werkers in die kerk te ondersoek en indien nodig die nodige reëlins daarvoor te tref.

#### Motivering

1. Die Sinode van Namibië (en waarskynlik ook ander sinodes) werk daartoe om die kerk te verinheems. In die Namibiese konteks beteken dit dat van die huidige gemeentes (bekend as Jonggemeentes of Boesmangemeentes – daarom etnies-georiënteerde gemeentes) ook in die toekoms hulle eie leraars behoort te hê wat die evangelie in hulle eie taal aan hulle eie mense kan verkondig. Nie almal in hierdie kategorie, wat geroepe voel daartoe, is akademies opgewasse om aan 'n goedgekeurde (Kerkordelike vereiste) instituut opgelei te word nie. Hulle sou egter, soos reeds die geval, indiens-opleiding kon ontvang deur geordende leraars. Die materiaal wat gebruik word, is teologiese materiaal van die Namibia Evangelical Theological Seminary (NETS). Hierdie persone sou as “Geestelike werkers” diens kon doen.
2. Sommige van die huidige Namibiese predikante van die VGK ressorteer onder pt 1 wat opleiding betref en het nie opleiding by 'n erkende instituut deurloop nie. Om die eenwordingsproses vlot te laat verloop en om hierdie leraars-/evangeliedienaars te akkommodeer, moet daarvoor voorsiening gemaak word.
3. Die ring sou steeds hierin die verantwoordelikheid behou om toesig uit te oefen, maar ook om voortdurende indiens-opleiding/VTO aan die geestelike werkers te gee.
4. Die ampspligte soos omvat in Artikel 9 kan eweseer deur 'n geestelike werker behartig word, met die uitsluiting van Art 9.2 wat slegs deur die leraar/konsulent behartig word.

### **B.3.2 ARTIKEL 63**

#### **Wes- en Suid-Kaap**

Die moderamen versoek die Algemene Sinode om die volgende punt by Art 63 te voeg: “Indien 'n ampsdraer voor of tydens 'n ondersoek na aanleiding van 'n tugklag of gerug teen hom/haar bedank, die bevoegde kerkvergadering voortgaan om die ondersoek te hanteer en die nodige besluit(e) te neem.”

## **B.5 VERHOUDINGS**

### **B.5.1 REGSADVIES TEN OPSIGTE VAN KERKVERENIGING**

#### **Wes-Transvaal**

Die Sinode besluit om as 'n saak van uiterste dringendheid advies in te win ten opsigte van sake rakende Kerkvereniging. Bekwame persone soos byvoorbeeld senior advokate en selfs 'n afgetrede regter kan betrek word. Die onduidelikhede wat opgeklar moet word is (vergelyk die vrae in die Agenda boek 1 van 2004 p13 by B.6.5 en die Handeling van die Algemene Sinode van 2004 p304 by 3.5):

1. Wanneer daar 'n stemming in die gemeente gehou word is dit die lidmate of die Kerkraad of albei wat bedoel word?
2. As 'n gemeente nie saamstem met Kerkvereniging of belydenisverandering nie, wat is so 'n gemeente se regsposisie dan? Kan so 'n gemeente voortbestaan as 'n gemeente van die Nederduitse Gereformeerde Kerk?
3. Wat is die regsposisie van die gemeente ten opsigte van die uitspraak van Hoofregter Kotzé in die Standerton-saak? As ons in hierdie verband van Kerk praat, is dit die Sinode, die Ring of is dit die Gemeente? Hierdie saak is uiters dringend en moet duidelik uitgespel word.

### **B.5.2 EEN GESAMENTLIKE SINODE**

#### **Wes-Transvaal**

Diep bewus daarvan dat daar tans verskillende menings ten opsigte van Kerkvereniging is en om die saak nie te laat sloer nie, stel ons graag die volgende voor as minimum-beginpunt vir Kerkvereniging:

1. Ons stel voor dat die 4 kerke van die NG Kerk familie (RCA, VGKSA, NGKA en NGK) saam sitting neem in een gesamentlike Sinode.
2. Hierdie een gesamentlike Sinode moet dringend byeen geroep word. Die Regskommissie kan adviseer gee hoe dit moet geskied.
3. Die samestelling van hierdie een gesamentlike Sinode word na die vier kerke se moderature/moderamens verwys om as 'n saak van dringendheid te bepaal.
4. 'n Gesprek tussen die vier kerke kan die een gesamentlike Sinode se funksies bepaal. Die huidige Algemene Sinode van die NG Kerk (wat nou in sitting is) kan 'n ad hoc-kommissie benoem om reeds tydens hierdie Sinode riglyne vir so gesprek voor te berei.
5. Hierdie een gesamentlike Sinode skryf 'n Kerkorde vir 'n verenigde kerk wat volgens die Hartenbosbesluite van 2004 deur twee derdes in die verskillende vergaderinge van ons Kerk goedgekeur moet word.
6. Die res van hierdie sake word gesamentlik bepaal.

## **B.6 BESTUUR, ADMINISTRASIE EN NAVORSING**

### **B.6.1 VERKIESING VAN MODERATUUR**

#### **Sinode Noord-Kaapland**

Die Sinode versoek die Algemene Sinode dringend om terug te keer na die gereformeerde stelsel van moderatuursverkiesing waarvolgens personeel van 'n meerdere vergadering aan die begin van die vergadering verkies word vir 'n termyn wat ten einde loop met die afhandeling van die vergadering.

### **B.6.2 ARTIKEL 40**

#### **Wes-Transvaal**

Verander Artikel 40 om soos volg te lees: "Na konstituering word die moderatuur verkies en voor die verdaging van die Algemene Sinode word 'n moderamen van die Algemene Sinode saamgestel."

### **B.6.3 SAMESTELLING ATLAS**

#### **Algemene Taakspan Leer en Aktuele Sake**

Die ATLAS versoek die Algemene Sinode om die samestelling van die Algemene Sinode se Taakspan vir Leer- en Aktuele Sake (ATLAS) by die sitting van die Algemene Sinode in 2007 te hersien, en wel op so 'n wyse dat elke Sinodale Kommissies vir Leer en Aktuele Sake (of die "diensgroep" of "taakspan" in 'n betrokke Sinode wat dié sake behartig) direk deur sy eie verteenwoordiger(s) op ATLAS verteenwoordig word.

#### Motivering

- a) In die tydsgewrig waarin ons leef, ontdek die NG Kerk die diversiteit van lidmate en hulle sienings oor leer- en aktuele sake al hoe meer. Ten einde die eenheid van leer en lewe temidde van dié diversiteit te bewaar, is dit dringend noodsaaklik dat die volle spektrum van stemme van die kerk oor leer- en aktuele sake ook in die kerk se kommissies/taakspanne op Algemene Sinodale vlak gehoor word.
- b) In ons tydsgewrig – met die hoë eise wat aan die eenheid van die kerk gestel word – is vervreemding van lidmate en gemeentes teenoor die leierskap van die kerk iets wat ten alle koste teengewerk moet word. Daarom is dit noodsaaklik dat elke Sinode se kommissie/diensgroep/taakspan wat leer- en aktuele sake behartig op ATLAS verteenwoordig moet word.
- c) Dit is, na ons mening, in hierdie tydsgewrig – waarin ons dit te wagte moet wees dat, weens ons erkende diversiteit, daar meer, eerder as minder leer- en aktuele kwessies ter sprake sal kom. In so 'n situasie, waarin die bestuur van diversiteit 'n groter rol sal moet speel, kan dit kontraproduktief wees om ATLAS saam te stel op die grondslag van 'n kleiner komitee van deskundiges, wat tot die gevolg het dat sommige sinodes glad nie direkte verteenwoordiging op ATLAS het nie.
- d) SKLAS (Wes-en-Suid-Kaap) is oortuig dat die probleem van koste grootliks oorkom kan word deur die gebruik van e-pos om verslae vinnig onder lede van 'n kommissie/taakspan te sirkuleer, te amendeer en te finaliseer. Maar selfs al mag dit 'n geringe mate van verhoogde koste teweeg bring, is dit ons insiens 'n klein prys om te betaal vir die uitbou van bewaring van eenheid in die NG Kerk, en hopelik in die toekomstige herenigde kerk.

### **B.6.3 FREKWENSIE VAN KERKRAADSVERGADERINGS**

#### **Namibië**

Die veertiende vergadering van die Namibiese Sinode versoek die Algemene Sinode om Artikel 28.1 te wysig om te lui: *Die kerkraad vergader ten minste tweekeer 'n jaar.*

#### Motivering

Die huidige artikel is onnodig voorskriftelik. Die moontlikhede wat tans bestaan om te desentraliseer en kerkrade te verklein (KO Art 26 en 27) maak so 'n voorskrif nie meer noodsaaklik of sinvol nie. Lüderitz-

gemeente is al vir meer as 10 jaar, vanweë die geografie en samestelling van die gemeente, nie instaat om aan hierdie voorskrif te voldoen nie.

### **B.6.5 ARTIKEL 58**

#### **Wes- en Suid-Kaap**

Die moderamen versoek die Algemene Sinode om die volgende punt by 58 in te voeg: “Indien die wangedrag van ‘n werknemer, anders as predikante, ‘n klag of gerug behels wat lei tot ‘n tugondersoek, word die kerklike ondersoek en besluite eers afgehandel voor die diensooreenkoms met die werknemer aandag kry. Die werknemer kan vir die duur van die ondersoek gestuit word”.